

# NIWAKATE HEBREUTEDI

Agica ane yowoogodi ane lidie nagadi niwakate hebreutedi, idoka oyowoogodi me judeu nigica ane idí. Oditibige me Paulo, ogoa domige Apolo ane idí. Moidí odidikotibige judeutedi anonakato Goniotagodi me dogoika monakato Goniotagodi Jesus, oditaga opitacelogo lakataga laamipi. Yelogoditiogi hebreutedi Jesus me nigijaagijoa Nigicoa ane niige Aneotedogoji me Gonewikatitogodi, codaa yelogodi nigina oko me dagadiaa yakadi me igenagatibigiwaji lodoe Aneotedogoji daga leegodi moyotete liigenatakanegeco Aneotedogoji ane iditedini Moisés, codaa nigina modioteci lakataga judeutedi ane dagadiaagica ane jaogate. Moidí oyalagata nigijo jotigide lakatigi judeutedi sacerdotitedi maleegonigodi eijedi anoibootalo Aneotedogoji mowotibige Aneotedogoji me dagalee iloikatidi oko leegodi libeyacegeco. Eledi yalagata Jesus me gonisacerdoti gonegegi, codaa me nadoogodi lawodi meotedibige Aneotedogoji me dibatacedogogi. Lawodi Jesus godiwilegitema inoatawece ane gobeyacegeco. Ikee nigida gela anejinaga me idinilakidenagatega Aneotedogoji me dagaxa mele, aliciagi nigijo oxiiigodi domaga gonimawenegegi me idinilakidenagatega Aneotedogoji. Yalagatiogi nigijo laamipi judeutedi Aneotedogoji ane yakadi me igenagatibigiwaji leegodi monakato, idaagida me nawikodeega.

Nigidiaagidi eo loniciwaga nigina anonakato Goniotagodi moyowo anodaageeteda Jesus me dinatiteta ijoatawece lawikodico, odaa leeditibige midagagaee modinatitalo lawikodico leegodi moditece Cristo. Codaa magaga onalagatibige nigica nogeedi anicota me yajigotediogi Aneotedogoji, nigica ane daga daa. Nogowidijedi lotaga jegeote ladeenaganegeco.

---

## Aneotedogoji ibake Lionigi me dinikeetedogowa

**1** <sup>1</sup>Nigijo jotigide Aneotedogoji eliodi me notaganegetedi godoiigi, codaa owidi anigotediogi me notaganegetediniwace jotigide godaamipi. Imonyatediogi nigijo anoyelogoditedibece Aneotedogoji lowooko moditece ane yemaa. <sup>2</sup>Pida natigide, niginoa owidijedi nokododi, Aneotedogoji ibake Lionigi me yelogodi nigica ane yemaa. Aneotedogoji ibake Lionigi meote inoatawece aninoa ditibigimedi, codaa aninoa digoina iigo, odaa ja iolatedice Lionigi me yajigoteta inoatawece mepoka nepiliditeda. <sup>3</sup>Lionigi datale digo mijoataga Aneotedogoji me datale, codaa liciagi Aneotedogoji. Ibake lotaga loniciweganaga me doweditedeloco codaa me ika midioka limedi minoa inoatawece niginoa ane jinataga. Nigidiaagidi negeote nimawenegegi me

napitagadi inoatawece gobeyacegeco, oada ja nicotedini digoida ditibigimedi nimeri gonegegi liwai libaagadi Aneotedogoji ane iige inoatawece.

<sup>4</sup>Oada jegeote me dagaxa me gonegegi nagaxatedeloco aanjotedi, digo ane Liboonagadi ane yajigote Aneotedogoji me dagaxa me gonegegi, agica liciagi. Aneotedogoji yajigote Liboonagadi me “Lionigi”.

**Lotaganagaxi Aneotedogoji ikee Lionigi Aneotedogoji  
me dagaxa me gonegegi caticedi aanjotedi**

<sup>5</sup>Lionigi dagaxa me gonegegi, igaataga Aneotedogoji agica otigidecece daga eeteta okanicodaagicata aanjo nigijoa lotaga aneeteta Lionigi, nigijo meeteta,

“Akamokakaamita makaami Ionigi,  
amina noko ja jaote me Ee Gadiodi.”

Eledi meeteta,

“Jegee Gadiodi,  
codaa akaami Ionigi.”

<sup>6</sup>Nigina Aneotedogoji me nadeegite Lionigi ane dagaxa me gonegegi nigina iigo,eledi mee,

“Akaamitawecetiwaji anakaami niaanajotedi Aneotedogoji  
ogeetetalo Ionigi!”

<sup>7</sup>Nigijo Aneotedogoji me yalagata aanjotedi, mee,

“Jaote iniaanajotedi micataga daga niwocotadi,  
codaa nigidiwa iniaanajotedi ane iotaka dinoo  
micataga daga galewaga.”

<sup>8</sup>Pida nigina Aneotedogoji nagaga yalagata Lionigi, mee,

“Inoenogodi,  
idioka limedi makaami ane diigenataka.  
Nigina me iigeni nigina oko,  
awii ganimawenegegi ane igenaga me iigenatakani.

<sup>9</sup>Emaani nigina ane igenaga,  
codaa gadelegedi nigina ane beyagi.

Joanigidaa leegodi Ee,  
Ganoenogodi Aneotedogoji,  
me gadiolaatice,

codaa me gadiwenigideni caticedi nigijoa gadokaagetepi,  
codaa jigidaa me jao meliodi me aniniitibeci.”

<sup>10</sup>Aneotedogojieledi yalagata Lionigi, nigijo negee,

“Goniotagodi,  
nigijo jotigide anigicatibige daga jinataga inoatawece aninoa,  
jagakamagakaami ane oeni iigo,  
codaa abakeni gabaagatedi me oeni ditibigimedi.

<sup>11</sup>Oada ditibigimedi inaa iigo icota me ma,  
pida akaami bigidioka limedi makaami.

Ditibigimedi inaa iigo icota me laxokodi  
micataga nowoodagagi moxiigodi.

<sup>12</sup> Atecigitiwage macataga wetagajo,  
codaa me iikoegeni  
micataga nigina me jiikoenaga nowoodagagi oxiigodi.  
Pida akaami bigidioka limedi makaami,  
adiniigi aneni,  
codaa agakaami oxiigodi.”

<sup>13</sup> Aneotedogoji agica degeeteta anigetigijo aanjo ane ligegiteta Lionigi, nigijo mee,  
“Anicooti digoina iwai ibaagadi  
nigepaagicota me jiigeke ganelogododipi.”

<sup>14</sup> Inoatawece aanjotedi niwicidi anodibatema Aneotedogoji, ane iige  
moyaxawa nigina oko aneote me newigatace.

### Leeditibige me jatacologojogotece lotaga Aneotedogoji

**2** <sup>1</sup> Aneotedogoji ibake Lionigi me godotaganenege, odaa leeditibige me  
jatacologojogotece lotaga anewi ane jajipaagatalo, amanagawini  
agejamagajogotice. <sup>2</sup> Nigijo nibodigi aanjotedi anodita Moisés ewi, codaa  
nigijo aneote Aneotedogoji igenaga nigina me iloikatidi nigijo oko leegotedi  
ijoatawece ane beyagi anowote, nigijo midatibece me dogoyiwagaditeda  
liigenatakanegeco Aneotedogoji. <sup>3</sup> Enice nige degejiwagatagateda lotaga  
gonegaga anonikeetogowa anodaagee Aneotedogoji meote godewiga,  
odaa agodiwoko nigina nige limedi me iloikatidi oko leegodi libeyacegeco.  
Goniotagodi Jesus jigijaa odoejege ane nikeetedogowa anodaagee Aneotedogoji  
meote godewiga. Odaa nigidiaagidi nigijo anowajipatalo jogonatematitedogowa  
lotaga. <sup>4</sup> Aneotedogoji ikee niginoa lotaga Lionigi mewi nigina meote gobinico  
anoikee anicota me loenatagi Aneotedogoji, inoa godoxicegetedi, codaa me  
icilatidi owidi eelotaginadi, codaa nigina me yajigotediogi oko lixaketedi  
anepaa yemaa me yajigotediogi, ane najigotedogowa Liwigo Aneotedogoji.

### Jesus jigijaageote godewiga

<sup>5</sup> Ejinagatece nigicoa nokododi nige dopitedijo Aneotedogoji Lionigi me  
diigenataka digoina iigo. Aneotedogoji ayajigotediogi aanjotedi loniciwaga  
moiige nigica gela iigo aneote anigida noko. <sup>6</sup> Maditaga lotaganagaxi  
Aneotedogoji, iwoteloco Davi ane ligegitalo Aneotedogoji, nigijo mee,

“Inoenogodi,  
igaamee ina mowoo ina oko,  
ane liotedawaana,  
ane digicata jaogate?

Igaamee ina madowetiteloco ina oko ane digica loniciwaga?

<sup>7</sup> Nigijoa nokododawaanaga adianite Goneleegiwa ane  
icogotibigimece ditibigimedi,

natinedi aanjotedi.  
 Pida natigide,  
 jagawenigideni  
 codaa jagajicitalo eliodi loniciwaga.

<sup>8</sup> Codaa jagajicitalo loniciwaga  
 codaa me nagatetigi me iige inoatawece aninoa.”

Nigijo Aneotedogoji naga yajigote loniciwaga me iigete inoatawece, odaa agica idi ane daga yajigote nigijoa Goneleegiwa ane icogotibigimece ditibigimedi me iige. Pida natigide jinataga aginatawece oko oyiwagadi.

<sup>9</sup> Pida ijoo me jinataga Jesus. Onatecigijoa nokododi Aneotedogoji ideyate Jesus natinedi aanjotedi, eotedibige me yeletetema inatawece oko meote lewiga, leegodi Aneotedogoji me iwikode nigina oko. Joanigidaa leegodi Aneotedogoji naga iwenigide codaa me yajigote eliodi loniciwaga.

<sup>10</sup> Aneotedogoji eote inoatawece aninoa codaa doweditedeloco inoatawece, codaa inoatawece nepilidi. Aneotedogoji nadeegite miniwataga eliodi oko meote me lionigipi, codaa me iwenigide. Enice joanigidaa mewi, nigijo meote lewiga oko, ika Jesus, me dawikode, odaa joanigidaa naga igodi libakedi. Jesus jigijaageote godewiga, joanigidaa ane libakedi. <sup>11</sup> Jesus iwilegitetema oko libeyacegeco. Odaa inatawece ane yapiditibigiwaji, codaa jiginiaaginiwa ane godapitagadi, odaa Eliodi, iniaaginiwa Godiodi. Joanigidaa leegodi Jesus aniboligatedogodici meetedogowa moko nioxoadipi. <sup>12</sup> Maditaga notaganagaxi enaco, meete,

“Inoenogodi,  
 ejitagadici miditaga inioxoadipi.  
 Jogetetagawa liwigotigi gadoiigi  
 nigina me yatecogo.”

<sup>13</sup> Codaa eledi mee,  
 “Emegeeta jagatalo Aneotedogoji.”

Eledi mee,  
 “Ite Ee minataga nigina oko  
 ane najigotediwa Aneotedogoji,  
 ane micataga daga lionigipi.”

<sup>14</sup> Nigina oko aneete Jesus me lionigipi Aneotedogoji, Aneotedogoji eote lawodi codaa me libole. Joanigidaa leegodi nigijo Jesus naga enitedini malee nigaanigawaanigi, Aneotedogoji yajigote lolaadi, lawodi codaa me liboledi. Eote lolaadi me liciagi godolaadi. Odaa jigidaagee menitedini liciagi okanicodaagica oko, eotedibige me yakadi me yeleo, odaa ja inoke loniciwaga diaabo ane domigijoo mida loniciwagateloco némaga. <sup>15</sup> Eleditace eotedibige me ikatedicoace nigina oko ane micataga daga niwilogojedipi leegodi modoitigi némaga inoatawece nokododi. <sup>16</sup> Ewi Jesus me daga enagiteda me yaxawateda aanjotedi. Pida enagi me yaxawa nigina oko anida aneetege licogegi Abraão. <sup>17</sup> Joanigidaa me leeditibige Jesus me diniciaceketedogogi, me digicata ane diniwokotedogodici. Eote me godiciaceekawa, eotedibige me gonisacerdoti gonegegi ane godiwikode

codaa midioka limedi meote libakedi anele. Eleeditace eotedibige me yakadi me yeletetema gobeyacegeco, eotedibige Aneotedogoji me dagadiaagoko laagetedipi. <sup>18</sup>Dawikode nigijo me dineetalo godaxakawa, joanigidaa leegodi miniaaginiwa yakadi me yaxawa nigina ane dineeta godaxakawa.

### Jesus iniaa Moisés

**3** <sup>1</sup>Inioxoadipi, Aneotedogoji gadiolaatedicoace makaami nepilidi, codaa eniditedagawa midioka limedi me ideoni miniwataga, odaa ina bogowoo Jesus, Nigijoa liigexegi Aneotedogoji, jiginiaa gonisacerdoti ane dagaxa me gonegegi, okotawece ane jinakatonaga. <sup>2</sup>Aneotedogoji iolatedice meote nigida libakedi me gonisacerdoti gonegegi, odaa idioka limedi meote inoatawece Aneotedogoji ane iigete meote, digo mijotaga Moisés midioka limedi meo ijoatawece nigijoa Aneotedogoji ane iigete meote me libaketedi liwigotigi Aneotedogoji loiigi. <sup>3</sup>Nigina oko ane dabitegetini diimigi dagaxa moiwenigide caticedi nigini diimigi loenatagi. Jigidaagee Jesus leeditibige moiwenigide caticedi Moisés, leegodi liciagi nigijo ane dabitegetini diimigi. <sup>4</sup>Natigide okanicodaagica diimigi ini noenatagodi, pida Nigijoa ane yoe inoatawece бага Aneotedogoji. <sup>5</sup>Moisés idioka limedi mele me diba liwigotigi loiigi Aneotedogoji, micataga daga niotagi ane dibatigi diimigi. Ikee nigica Aneotedogoji ane yatemati nigidiaagidi. <sup>6</sup>Pida Cristo бага dagaxa me gonegegi caticedi okanicodaagica niotagi. Igaataga eote ijoatawece nigijoa Aneotedogoji ane iigete meote, micataga nigina nionigi ane dowediteloco diimigi. Oko бага godiciagi nigini diimigi, nigidioka limedi mabo godaalegena, codaa nigidioka limedi me jinakatonaga mida gonagajegi ane inibeonagatege.

### Gonajoinegegi me daga jakakagataga godaalegena

- <sup>7</sup>Odaa digawini ane ligegi Liwigo Aneotedogoji, mee,  
 “Nige ajipaatiwaji ligegi Aneotedogoji nigina noko,  
<sup>8</sup> jinaga akakagati gadaalegenali,  
 digo mijotaga anee jotigide gadaamipi  
 miditaga nipodigi ane yadilo ane digicata nigeladimigipi,  
 nogodakapetege Aneotedogoji,  
 codaa modineetalo.”
- <sup>9</sup>“Odaa mee Aneotedogoji,  
 ‘Digoida miditaga nigijo nipodigi ane yadilo,  
 jotigide gadaamipi odineetiwa,  
 idaagee monadi libinico ane jaote nigijoatigilo cwareenta nicaagape.
- <sup>10</sup>Joanigidaa leegodi me idelatema nigijo noiigi,  
 odaa meji,  
 “Idi anidioka limedi meyamagaticoace inaigi  
 codaa agoyemaa moyiwagadi iigenatakanegeco.”
- <sup>11</sup>Odaa naga idelatema

odaa ja jao igegitiogi meji,  
 “Nigidi agica ane yakadi micota nigidi nipenagadi  
 ane jilakidetema yoigi.” ”

<sup>12</sup>Inioxoadipi, adowetita adigica nigina akaamitiwaji ane abeyacege laalegena aneo me daga nakatoteda Goniotagodi, codaa nigida niciagi gadadeegiticogi ditigedi motonitedice Aneotedogoji, Nigijoa ewikegi. <sup>13</sup>Pida akamagakaami adinoniciwagatitiwage inoatawece nokododi maleegakati majipaata ligegi Aneotedogoji, amanagawini agicoa nigina akaamitiwaji ane dakake laalegena, leegodi libeyacegeco ane inaale. <sup>14</sup>Igaataga oko lokaagetepi Cristo nige idokee me jinakatonaga nigepaa godiniogo, digo mijotaga me jinakatonaga maleekoka joleegatibige me jinakatonaga.

<sup>15</sup>Igaataga mee lotaga Aneotedogoji,  
 “Nigajipaata ligegi Aneotedogoji nigina noko,  
 jinagakakagati gadaalegenali,  
 mijotaga anee jotigide gadaamipi nogodakapetege Aneotedogoji,  
 codaa modineetalo.”

<sup>16</sup>Amiidi ica anowajipatalo Aneotedogoji odoo nigidiaagidi ja nakapetegi? Ijotawece nigijo oko ane nogaticoace Moisés me ideitice Egito. <sup>17</sup>Amiidi ica Aneotedogoji ane yelatetema icoatigilo cwareenta nicaagape? Yelatetema nigijo anowote loenataka ane beyagi odoo ja nigo miditaga nipodigi ane yadilo ane digicata nigeladimigipi. <sup>18</sup>Nigijo Aneotedogoji negeote ligegitediogi ica noiigi me dogoyakadi motota ane yoetetema me nipenagadi loiigi, amiidi ica aneetediogi Aneotedogoji? Eetetece Aneotedogoji nigijo ane dogoyiwagaditeda. <sup>19</sup>Odaa ja jinataga agoyakadi motota nigica nipodigi Aneotedogoji ane yemaa me yajigotediogi loiigi, leegodi me dogonakatoteda.

### Ica nipenagadi loiigi Aneotedogoji

**4** <sup>1</sup>Aneotedogoji eote ligegitedogogi me jakataga me jakagatiwece codaa me inipenagatini miniwataga digoida ditibigimedi. Enice ele me idinowetaga adigica nigina akaamitiwaji aneyamagatice, oditaga agalee yakadi me iwida nigica gonipenagadi. <sup>2</sup>Igaataga oko eledi jajipaagatalo nibodicetedi anele ane icogotedibigimece miniwataga Aneotedogoji, digo mijotaga godaamipi mowajipatalo. Owajipatalo lotaga Aneotedogoji, pida nigijo mowajipatalo agica anoniboloiteetece leegodi agoyiwagadi. <sup>3</sup>Igaataga nigida moko baanaga jinakatonaga Goniotagodi, бага jakagatio miditaga gonipenagadi. Pida begetediogi Aneotedogoji godaamipi,

“Idelatema nigijo oko  
 odoo ja jao igegitiogi me digicata ane nakatiobece  
 odoo anipenaga digoina meetaga”.

Aneotedogoji eote nigida ligegi leegodi me dakapetetege jotigide godaamipi idaagee naga igodi inoatawece me ilakidetedi nipenagadi.

<sup>4</sup>Digawini anodaagee Aneotedogoji me yalagate nigica noko gonipenegegi maditaga lotaganagaxi, mee, “Aneotedogoji yadeegi dibatio gobaagadi nokododi meote inoatawece ane loenataka, odaa negeledi noko jaganipetedini.” <sup>5</sup>Odaa ja yalagatace nigica noko, nigijo mee, “Agoyakadi me nakatiobece oditaga nipenaga meetaga.” <sup>6</sup>Nigijo odoejedipi oko anowajipatalo nibodicetedi ane icogotedibigimece miniwataga Aneotedogoji adakatiobece miditaga ica domaga nipenagadi ane yoetetema Aneotedogoji, leegodi agoyiwagadi lotaga. Pida ina eledi oko anepaga dakatiobece miditaga nigica nipenagadi. <sup>7</sup>Igaataga Aneotedogoji ja iolatedice eledi noko anidokeyatedigi me “Nigina noko”. Nigijo jotigide godaamipi oyotigimade Aneotedogoji. Odaa naga ixomagatedijo owidi nicaagape, Aneotedogoji ja iige Davi meetece nigijoa notaga baanaga ejinagatece, “Nigajipaata ligegi Aneotedogoji nigina noko, jinaga akakagati gadaalegenali!”

<sup>8</sup>Josué daantaga yadeegi nigijo noiigi miditaga nigica nipenagadi anejinagatece, daganagawini Aneotedogoji ageetetece nigidiaagidi nigica eledi noko aneyatedigi me “Nigina noko”. <sup>9</sup>Odaa jigidaagee egidita ica nipenagadi Aneotedogoji loiigi, digo mijoataga Aneotedogoji manipetedini naga saabado naga igodi inoatawece ane loenataka. <sup>10</sup>Igaataga nigijo ane dakatio manipetini miniwataga Aneotedogoji digoida ditibigimedi, nigini oko ja ika inoatawece libaketedi, digo mijoataga Aneotedogoji manipetedini odaa ja ika libakedi. <sup>11</sup>Enice ele me idinoniciwagataga me jakagatio, me inipenagatini miniwataga Aneotedogoji, amaleegaga agica oko ane yotigimade Aneotedogoji mijotaga jotigide godaamipi moyotigimade, odaa agaleegoyakadi me dakatiobece aneite Aneotedogoji.

<sup>12</sup>Igaataga niginoa notaga ane iwoteloco Aneotedogoji lotaganagaxi liciagi nigina ane yewiga codaa mida loniciwaga. Yakadi me dakatedio caticedi me liciagi nodaajo-ocagataga ane dalepe idoatawece liwailidi. Igaataga niginoa notaga yakadi me yakagidi codaa me yawalacetiwage godowooko codaa me godiwigo, liciagi nigijo nodaajo me yakadi me iomagaditege libitagi, libole. Niginoa lotaga Aneotedogoji oikee domige beyagi, ogoa, domigele niginoa ane godemaanaga, inoa godowooko catiwedi godaalegena. <sup>13</sup>Agica ane jakataga me jagatagatema Aneotedogoji. Inoatawece ane loenataka yelogotologo, inoatawece naditedeloco. Codaa leeditibige me idinigeegatalo, inoatawece ane godoenataka.

### Jesus gonisacerdoti gonegegi anele

<sup>14</sup>Enice ele me jatitagateloce gotiwagatakanegegi, igaataga iniwa gonisacerdoti gonegegi aneledogodomi, ane dakatediwece digoida ditibigimedi, lodoe Aneotedogoji. Jesus jiginiiaa gonisacerdoti, Lionigi Aneotedogoji. <sup>15</sup>Niginiwa gonisacerdoti gonegegi yakadi me godiwikode nigina me godagamalaga, codaa nigina me jawikodeega, igaataga Iniaaginiwa odineetalo inoatawece anodigotalo, codaa me dawikode digo mokotaga, pida baadegeote ane beyagi. <sup>16</sup>Enice iniga lodoe Aneotedogoji anidioka limedi meliodi meletedogodomi, jigataga me daga

idoiigatalo amaleegaga godiwikode Aneotedogoji, codaa amaleegaga eliodi meletedogodomi, codaa me godaxawatetece niginoa godagalanaga.

**5** <sup>1</sup>Ijoatawece nigijoa goneleegiwadi ane ijo me lacilodi-sacerdotitedi oiolatoicoace liwigotigi eletidi goneleegiwadi, oixipeticoace modibatema Aneotedogoji moyaxawa eledi oko. Oyadeegitalo Aneotedogoji liboonaga nigijo oko, codaa me nigijoa ejedi anonigodi owotibige Aneotedogoji me ixomagateetedice nigijoa libeyacegeco anowote nigijo oko. <sup>2</sup>Oyakadi moiwikode nigijo oko nigina mowote libatico ane dogoyowoogoditeda me beyagi, codaa nigijo oko anoninaaletiniwace, oada jegeyamagaticoace, igaataga iniaagini idatecibece me nagamalaga, codaa me dibatá. <sup>3</sup>Leegodi magaga dibatá, oada leeditibige magaga nigodi ejedi agijoka leegotedi nigijo oko libeyacegeco, pida eledi leegodi aagaga libeyacegeco. <sup>4</sup>Agica ane yakadi mepaa diniwenigide codaa agica ane yakadi degepaa diniomagaditice me lacilo-sacerdotitedi nigijo jotigide, pida ijokijo nigijo Aneotedogoji ane



(Hebreus 5.1)



iolatedice, codaa anenidite me niginiaa lacilo-sacerdotitedi, digo mijotaga nigijo jotigide Aneotedogoji negenidite Arão me nigijaa lacilo-sacerdotitedi.

<sup>5</sup>Joanigidaa Cristo me daga diniwenigideteda, codaa me degepaa dinixipetedice me niginiaa lacilo-sacerdotitedi. Pida Aneotedogoji epaa iwenigide, nigijo negeeteta,

“Akaami Ionigi.

Nigina noko jao me Ee Gadiodi.”

<sup>6</sup>Miditaga eledi liwai lotaganagaxi Aneotedogoji, mee Aneotedogoji,

“Idioka limedi makaami sacerdoti,  
gadiciagi mijotaga Melquisedeque,  
nigijo jotigide.”

<sup>7</sup>Nigijo Jesus maleeginaagite digoina iigo, yotaganegetedibece Aneotedogoji, dipokote. Igedi me dotaga codaa datiidi me dipokote Aneotedogoji me nogatedice lawikodigi nigidaagoyatedigi moyametibigo negepaa yeleo. Odaa Aneotedogoji wajipate Jesus ane lipoketegi leegodi me yemaa meote icokica nigica ane yemaa Aneotedogoji. <sup>8</sup>Idaagida me Lionigi Aneotedogoji, pida nigijo Jesus naga dawikode, odaa ja yowoogodi me leeditibige midioka limedi meyiwaagadi Eliodi leegotedi lawikodico. <sup>9</sup>Nigijo Jesus naga ixomagateetedijo ijoatawece ane leeditibige me lawikodico, odaa jegeote me Gonewikatitogodi. Odaa ja yakadi meote midioka limedi me newiga inatawece oko anoyiwaagadi. <sup>10</sup>Odaa Aneotedogoji ja yelogoditedibece me niginiaa iolatedice Jesus me gonisacerdoti gonegegi, digo mijotaga Melquisedeque.

#### **Leeditibige me godili mejiwagatakanaga odaa agejamagajogotice**

<sup>11</sup>Ja domaga eliodi me idalaga Melquisedeque, pida dakake me jelogoditagawatiwaji ane diitigi, leegodi jagakakagati gadaalegenali, odaa agajipaatiwaji. <sup>12</sup>Ja leegi makaamitiwaji manakatoni Goniotagodi, odaa ja domagakatitiwaji dagakaami niigaxinaganadi. Pida nigida makaamitiwaji eleeditibige mini oko ane gadiigaxinitacece niginoa niigaxinaganegeco ane daga dakaketeda maditaga Aneotedogoji lotaganagaxi. Nigida makaamitiwaji jigide eni micataga nigina dagakaamitace nigaanigipawaanigi anoyopotibige waca-lotiidi, analee dogoyakadi moyeligo nigina baanaga niweenigi. <sup>13</sup>Nigina nigaanigawaanigi bagaleegilibi, ayakadi me yowoogoditece liigaxinaganegeco Aneotedogoji lotaga ane ikee anele, codaa ane beyagi, leegodi malee nigaanigawaanigi. <sup>14</sup>Pida nigida eledi niweenigi, liweenigi nigina baanaga oko, nigijo baanogoyowoogodi moiwi nigina ane igenaga, inaagina ane beyagi, odaa owo inokina ane igenaga.

**6** <sup>1</sup>Enice joleegatibige midapaga jiigaticogi odoe me idiniigaxinaga. Jikanaga me jiigaxinaganagatece nigijoa odoejeidi niigaxinaganegeco ane daga dakaketeda anoditece Cristo. Odaa ele me idiniigaxinagatece

niigaxinaganegeco ane dakake, amaleegaga ili gotiwagatakanegegi. Jinagalee idiniigaxinagatacece me leeditibige me idinilaanagatece gobeyacegeco anowo oko midioka limedi me yeleo, codaa jinagalee idiniigaxinagatacece me leeditibige me jinakatonaga Aneotedogoji. <sup>2</sup>Jinagalee idiniigaxinagatacece niigaxinaganegegi aneetece me idinilegenaga, codaa anodaagee judeutedi me diniwilegi, codaa me niigaxinaganegegi aneetece anodaagee Liwigo Aneotedogoji me iige oko nigina me jipekenagateloco gobaagatedi. Jinagalee idiniigaxinagatacece niigaxinaganegegi aneetece anodaagee Aneotedogoji meote émagaga me newigatace, codaa anodaagee me iwi, oada midioka limedi me iloikatidi nigina oko abeyacagaga. <sup>3</sup>Enice jikanaga inoa niigaxinaganegeco, oada idiniigaxinagatacece niigaxinaganegeco бага dakake, nige godika Aneotedogoji me jaoga.

<sup>4</sup>Oada ele me joleegatibige midapaga jiigaticogi odoe me idiniigaxinaga, igaataga nigijo aneyamagatice eliwagatakanegegi, codaa ane dagalee yemaa me diotece Goniotagodi, agaleegica nimawenegegi me dinilaatace. Ja yowoogodi nilokokena Aneotedogoji, codaa ja ici nigijo nogeedi Aneotedogoji ane yajigoteta, codaa jigijo me deemitece loniciwaga Liwigo Aneotedogoji catiwedi laalegena. <sup>5-6</sup>Jigijo me ici lotaga Aneotedogoji, oada ja yowoogodi mele, codaa jigijo me ici niginoa lixaketedi anele ane yajigota Aneotedogoji Liwigo, nigeyamagatice oada agalee yemaa me diotece Goniotagodi, agaleegica gonimawenegegi daga jaoga me dinilaatacece libeyacegeco, igaataga nigida anee micataga daga yototacedini Lionigi Aneotedogoji, oada ja yametibigimece lodoe eledi oko.

<sup>7</sup>Nigina oko liciaceekawa iigo. Igaataga nigina ebici midatibece menitinigi iigo, oada iigo jiginoa ane nokologoteloce nawodigijedi anele, ane yemaa nawodaganaga, oada Aneotedogoji ibinie nigidi iigo. <sup>8</sup>Pida nigina iigo minoka yajigoteda lalepigigoli inaa lewaga ane digicata aneletema, doidetibige Aneotedogoji me ixoo nigidi iigo, codaa me yalegi.

<sup>9</sup>Pida idaagidata mejinaga nigijoa godotaga, yokaagetedipi yemaanigipi, agejiwagatakanaga dagamigiticoace, pida ejiwagataga midioka limedi me ikeeni anodaageni me gadewiki Aneotedogoji meote gela gadewiga. <sup>10</sup>Aneotedogoji igenaga, codaa ayaagiditedibige nigijo gabakedi anawiitiwaji, codaa me gademaanaganegegitalo anikeenitiwaji nigijo maxawani codaa nigina natigide maxawani ganioxoadipi, domogonoga libeyacegeco. <sup>11</sup>Eliodi me jemaanaga moninitecibeci nigina akaamitiwaji midioka limedi madinoniciwagatitiwaji nigepaagicota nigica owidijegi noko, amaleegaga abaatege nigica ganagajegitiwaji ane nibeotagagi. <sup>12</sup>Ajemaanaga dagakaamitiwaji abacigegipi, pida iwitece anodaagee nigina aneniwagatakanaga, codaa odinatitalo inoatawece, amanagawini abaatege nigica Aneotedogoji anee me yajigotedagawatiwaji.

### **Nigina Aneotedogoji ane ligegi, idioka limedi meote**

<sup>13</sup>Nigijo jotigide Aneotedogoji eote ligegitetege Abraão. Nigijo negeote ligegitetege, Aneotedogoji ibake epaa Liboonagadi, igaataga agica eledi

boonagadi ane dagaxa me gonegegi. <sup>14</sup>Nigijo Aneotedogoji negeote ligegitetege Abraão, meeteta, “Jao igegitagagi jaotagadomi nigina anele, codaa jaotagadomi mowidi gadionigipi, gadawaga.” <sup>15</sup>Abraão abotege me dinatita me nibeotege nigijo ane ligegiteta Aneotedogoji, joanigidaa leegodi me dibatege nigijo aneeteta Aneotedogoji me yajigote. <sup>16</sup>Nigina oko mowo ligegi, oibake eledi oko liboonagadi ane dagaxa me gonegegi moikee mewi mowo nigida ane ligegi. Odaa nigina mowo nigegeitege eledi oko, odaa ja yaagadi okanicodaagica notigimadigi. <sup>17</sup>Aneotedogoji yemaa meote me yenikamaga moyowoogodi nigina oko nigica aneote ligegitetege. Yemaa me ikee me daga anojicetetema ane ligegi. Joanigidaa leegodi me ibake epaa Liboonagadi nigina meote nigijo ligegitetege Abraão. <sup>18</sup>Joanigidaagee idoa itoataale ane daga yakadita me diniigi: Jiginiaa Aneotedogoji aneote ligegi, codaa jiginiaaginiwa ane ibake epaa Liboonagadi. Odaa joanigidaagee Aneotedogoji ayakadi daga godinaale. Codaa joanigidaa leegodi me jotetagtini, okomodi baanaga jelagatalo Aneotedogoji me godotete, codaa jakataga mabo godaalegena me inibeonagatege gonagajegi anicota me najigotedogowa. <sup>19</sup>Nigina me inibeonagatege nigica gonagajegi, ele me joleegatibige me jotetagateloce gotiwagatakanegegi, odaa agejamagajogotice daga jotonagatedice Aneotedogoji. Nigina me jotetagateloce gotiwagatakanegegi, gotiwagatakanegegi liciagi nigina gapilecege anoyate catinedi ninyogodi ane daga ika niwatece me yadeegi ninyogodi, igaataga dotetetini. Inibeonagatege Nigijoa ane dakatediwece digoida lodoe Aneotedogoji, micataga nigijo lacilo-sacerdotitedi me dakatiobece Aneotedogoji ligeladi, ixomagatice caticedi nagajo lipegetege epoacajo, odaa ja dakatiwece digoida lodoe Aneotedogoji. <sup>20</sup>Jesus jigijaa odoejegi me dakatediwece lodoe Aneotedogoji digoida ditibigimedi me godelegete. Jigijaagijoa anidioka limedi me sacerdoti gonegegi, liciaceekawa mijotaga sacerdoti Melquisedeque.

### Melquisedeque, sacerdoti codaa me inionigi-eliodi

**7** <sup>1</sup>Nigica jotigide ica Melquisedeque ninionigi-eliodi aca nigotaga ane liboonagadi Salém, codaa me sacerdoti ane dibatema Aneotedogoji ane iige inoatawece. Nigica Abraão naga dopitice me diwitide nigica naga nigodi icoa ciinco inionaga-eloodoli anoideloge, odaa Melquisedeque jigigo dakapetege, odaa ja ibinie. <sup>2</sup>Odaa Abraão ja yajigota Melquisedeque nidiizimo icoatawece nigicoa lateka ane nepilidi nigijoa inionaga-eloodoli. Ica liboonagadi Melquisedeque one amina anejinagata “Inionigi-eliodi ane igenaga”, iniaagini ninionigi-eliodi aca Salém, amina anejinaga “Inionigi-eliodi aneote mele godaalegenali”. <sup>3</sup>Codaa agica ane yowoogodi nigica eliodi otegexaagaga aca eliodo, otegexaagaga ica nelokododipi. Agica ane yowoogodi ica negenitini, codaa ica naga yeleo. Odaa ja liciagi Aneotedogoji Lionigi, igaataga ijaagijo idioka limedi me sacerdoti.

<sup>4</sup>Digowootiwaji Melquisedeque me dagaxa me gonegegi! Abraão aneliodi inatawece godoiigi pida yajigota Melquisedeque nidiizimo nigicoa lateka me diwitide. <sup>5</sup>Nigijo anida aneetege licogegi Levi, nigijo lionigi Jacó, ane libatadegegi

me sacerdotitedi. Nigijoa lajoinaganegeco Moisés iige nigidiwa sacerdotitedi modibatege nidiizimo nigidi noiigi, inoatawece ane nepilidi, idaagee nigidi noiigi me nioxoadipi, codaa mida aneetege licogegi Abraão. <sup>6</sup>Melquisedeque agica aneetege licogegi Levi, pida dibatege nidiizimo Abraão, liwai nigicoa lateka. Odaa ja ibinie Abraão, nigijoo ane dibatege nigijoo ane ligegitetege Aneotedogoji me yajigote. <sup>7</sup>Ajawienatakanaga me nigina ane ibinie eledi oko dagaxa me gonegegi caticedi nigini ane ibinie. <sup>8</sup>Nigijoo anida aneetege licogegi Levi anodibatibigege nidiizimo nigica oko, liwai ane nepilidi, nigidiwa goneleegiwadi anodibatibigege baga nigo. Pida lotaganagaxi Aneotedogoji mee nigijoo analeegini me yewiga ja dibatege nidiizimo Abraão, liwai lateka. <sup>9</sup>Jakataga mejinaga nigijoo Abraão naga yajigo nidiizimo, liwai lateka, odaa Levi micataga degeledi yajigota Melquisedeque nidiizimo nigijoo Abraão naga yajigo, liwai lateka. <sup>10</sup>Levi anigica degenitini, pida itigi lolaadi nelokodi Abraão nigijoo Abraão naga dakapetege Melquisedeque. (Joanigidaa leegodi me jakataga mejinaga Levi magaga yajigota Melquisedeque nidiizimo nigijoo Abraão naga yajigo liwai lateka.)

<sup>11</sup>Nigijoo Aneotedogoji naga yajigote loiigi Israel nigijoo lajoinaganegeco Moisés, iige nigijoo leviitadedi anida aneetege licogegi Arão me sacerdotitedi. Pida nigijoo libakedi ayakadi degeo nigidi noiigi midioka limedi me newiga miniwataga Aneotedogoji. Joanigidaa leegodi naga leeditibige eledi latopagi sacerdoti, liciagi Melquisedeque, pida baadaga liciagi Arão. <sup>12</sup>Pida nigina me leeditibige me diniigi ane latopagi sacerdoti, odaa eledi leeditibige me diniigi lajoinaganegeco Moisés. <sup>13</sup>Lotaganagaxi Aneotedogoji eetece nigica eledi sacerdoti, codaa eledi ane licogegi, agica aneetege licogegi Levi. Agica otiginitece oko nigida ane licogegi ane dibatema Aneotedogoji me nigodi codaa me yalegi eijedi maditaga Aneotedogoji nameeja. <sup>14</sup>Jowoogotaga Goniotagodi mida aneetege ane licogegi Judá. Pida Moisés agica degee nigina oko anida aneetege licogegi Judá daga yakadi mowo me sacerdoti.

### Ica eledi sacerdoti ane liciagi Melquisedeque

<sup>15</sup>Digawini jegenegegi yenikamaga naga diniigi anodaagee sacerdoti, igaataga jegenoo eledi ane latopagi sacerdoti ane liciaceekawa Melquisedeque. <sup>16</sup>Adinoe me sacerdoti daga leegotedi niigenatakanegeco anowo licogegi Levi me sacerdotitedi. Pida dinoo me sacerdoti leegodi iniaa loniciwaga aneo midioka limedi me yewiga, igaataga agica ane yakadi me yaagadi lewiga. <sup>17</sup>Igaataga lotaganagaxi Aneotedogoji eetece, nigijoo mee, “Idioka limedi makaami sacerdoti, gadiciaceekawa Melquisedeque.” <sup>18</sup>Jigidaa naga yaagadi nigijoo lajoinaganegegi Moisés aneetece nigica ane yakadi me sacerdoti. Igaataga nigijoo najoinaganegegi inokeo me sacerdoti nigina oko ane digica loniciwaga, codaa ane digica ane jaoga. <sup>19</sup>Igaataga liigenatakanegeco Aneotedogoji agica loniciwaga degeo oko me igenaga. Pida Aneotedogoji jegeote nigica eledi ane dagaxa meletogodomi ane inibeonagatege. Odaa leegodi nigica ane inibeonagatege, odaa ja jakataga me jipecagatege Aneotedogoji, leegodi godilagatege.

<sup>20</sup>Aneotedogoji eote ligegitetege Jesus nigijo negeote me sacerdoti. Pida nigijo anida aneetege licogegi Levi nigijo nogowote me sacerdotitiedi, Aneotedogoji agica degeote ligegitetege. <sup>21</sup>Pida nigijo Jesus naga sacerdoti, Aneotedogoji eote ligegitetege, meeteta,

“Goniotagodi Aneotedogoji eote ligegi  
codaa aiigi lowoogo.

Nigida makaami idioka limedi makaami sacerdoti,  
digo mijotaga Melquisedeque.”

<sup>22</sup>Leegodi Aneotedogoji meote ligegitetege Jesus, oada Jesus dagaxa meliodi loniciwaga meote nigijo Aneotedogoji ane ligegitetege, nigijo negeote me godilagatacege Aneotedogoji meote godewiga.

<sup>23</sup>Digawini eledi ane jinaditece. Nigijo jotigide ijoa owidi sacerdotitiedi leegodi me nigo oada agoyakadi midioka limedi me nibaaga. <sup>24</sup>Pida Jesus bigidioka limedi miniwa me yewiga, oada yakadi midioka limedi me sacerdoti, oada aleeditibige eledi sacerdoti ane waxodi limedi.

<sup>25</sup>Joanigidaa leegodi mida loniciwaga meote midioka limedi me newiga nigina oko ane yadeegiteta Aneotedogoji, igaataga idioka limedi me yewiga me dipokotedibigeloco nigidi oko miniwataga Aneotedogoji.

<sup>26</sup>Enice Jesus jigijaagijoa nigica sacerdoti gonegegi ane jopoogatibige. Ijaagijoa liciagi Aneotedogoji, agica degeote ane beyagi, agica nibeyacegegi catiwedi laalegena. Aneotedogoji iomagaditdice Jesus liwigotigi nigina oko abeyacagaga, oada Aneotedogoji ja yadeegi me ideite miniwataga mepaa iige inoatawece.

<sup>27</sup>Jesus aliciagi nigijoa eletidi sacerdotitiedi ane leeditibige monigodi eijedi oada jogoyajigotalo Aneotedogoji inoatawece nokododi, leegotedi epaa libeyacegeco codaa me libeyacegeco eledi oko. Igaataga Jesus epaa diniboote Aneotedogoji leegotedi libeyacegeco oko. Oada onijoteci meote, oada agalee leeditibige degeotace, igaataga nigijo aneote idioka limedi me diniwaloe. <sup>28</sup>Nigijoa lajoinaganegeco Moisés iolaticoace goneleegiwadi me lacilodi-sacerdotitiedi, pida nigidiwa goneleegiwadi inoa libeyacegeco. Pida nigidiaagidi Moisés naga igodi me idi lajoinaganegeco, nigidiaagidi Aneotedogoji jegeote ligegi, oada ja iolatedice Lionigi, nigijoa aneote midioka limedi me sacerdoti ane digica libatiigi.

### Jesus gonisacerdoti gonegegi

**8** <sup>1</sup>Ijoatawece nigijoa godotaga anejinagatece, idiwa ane dagaxa me gonegaga baanaga ejinaga natigide. Iniwa gonisacerdoti gonegegi ane nicote liwai libaagadi Aneotedogoji anida loniciwagatedeloco inoatawece. <sup>2</sup>Niginiwa sacerdoti eote libakedi lodoe iniaaginiwa Aneotedogoji. Ageote libakedi catiwedi nopegedi liciagi nigijo anowo loigi Aneotedogoji nigijo jotigide, pida libakadi nigijo nimeri Goniotagodi Aneotedogoji ane yoetema, nimeri ane igenaga, digoida ditibigimedi.

<sup>3</sup>Ijoatawece lacilodi-sacerdotitiedi oiolaticoace moyadeegitalo Aneotedogoji nigicoa liboonaga nigina oko, codaa minoa eijedi anonigodi, owotibige

Aneotedogoji me ixomagateetedice libeyacegeco. Joanigidaa leegodi me leeditibige gonisacerdoti gonegegi magaga leeditibige midi ica ane yadeegiteta Aneotedogoji. <sup>4</sup>Diginaagite nigina iigo, agotaga sacerdoti, igataga owidi sacerdotitedi anoyadeegitalo Aneotedogoji liboonaga nigijo oko, ane liigenatakanegegi najoinaganegeco judeutedi. Codaa Cristo agica aneetegege licogegi Levi daga liciagi nigijoa eletidi sacerdotitedi. <sup>5</sup>Nigidiwa eletidi sacerdotitedi odibatema Aneotedogoji catiwedi nopegedi ane liwigo nigica digoida ditibigimedi, codaa micataga daga liwa nigica ane libakadi Jesus digoida ditibigimedi. Joanigidaa leegodi nigijo Moisés maleekoka doletibige meo ica lopegedi Aneotedogoji, Aneotedogoji yajoi meeteta, “Adowetita, awii liciagi nigini gawinigi ane jikeetagawa digoida maditaga wetiga.” <sup>6</sup>Pida natigide Cristo ja dibategege libakedi ane dagaxa mele caticedi nigijoa jotigide libaketedi nigijoa sacerdotiteditigi nigina iigo. Codaa nigijo Jesus aneote eo Aneotedogoji inaa goneleegiwadi moyakadi gela nimawenegegi me dinilakidetiwage, eo ane dagaxa mele, aliciagi nigijo jotigide anee me dinilakidetetege oko. Igataga nigijo Aneotedogoji negeote ligegi, nigijo aneetegege dagaxa meletogodomi.

<sup>7</sup>Codaa nigijo odoejege anigotedogowa me dinilakidetedogogi daaditaga nagamalaga, Aneotedogoji agotaga leeditibige meote gela anigotedogowa me dinilakidetedogogi. <sup>8</sup>Pida Aneotedogoji laagetedipi loiigi, nigijo naga dogowo nigica ane dinilakidetetege, oada jegee,

“Icotalo nokododi’,

mee Goniotagodi Aneotedogoji,

‘Nige jao gela anejigo me idinilakidetege loiigi Israel,  
codaa me loiigi Judá.

<sup>9</sup>Nigida gela anejigotagawatiwaji me idinilakidetagagi aliciagi nigijo oxiiigodi anejigota me idinilakidetege jotigide gadaamipi, nigijo noko naga jibatigi libaagatedi me jadeegiticogi wetice niigo Egitto. Pida agowo nigijo ane igegi me idinilakidetege, joanigidaa leegodi naga jikaticoace’, eledi mee Goniotagodi Aneotedogoji.

<sup>10</sup>‘Nigicotalo nokododi,  
nigicota me idinilakidetacege loiigi Israel,  
jigidaagee’,  
eleditace mee Goniotagodi Aneotedogoji.  
‘Jao midioka limedi moyowo iigenatakanegeco.  
Codaa jixotediwece catiwedi laalegenali  
micataga daga jiditedini.  
Jaotace me Ee Noenogodi,  
idiaagidi jaotace me yoiigi.

<sup>11</sup>Agaleegica ane leeditibige daga iigaxi lipecagawa otegexaagaga nioxoa

anodaagee me yakadi me yowoogodi Goniotagodi Aneotedogoji,  
 igaataga inatawece etidowoogodi,  
 nigina ane dagaxa me iwikodadipi  
 codaa me nigina ane dagaxa me gonegaga.

<sup>12</sup> Igaataga jiwikodetibigiwaji

codaa jixomagateetedice niginoa ane daga igenagateda loenataka,  
 codaa agalee nalagatibigiji ane libeyacegeco,  
 codaa agalee jiloikatiditibigiwaji.”

<sup>13</sup> Nigijo Aneotedogoji me eetetece ica gela anigotedogowa me  
 dinilakidetedogogi, ikee nigijo oxiigodi ane domigigotedogowa me  
 dinilakidetedogogi me dagadiaagica jaoga. Nigina ane dagadiaagica  
 jaoga, codaa moxiigodi, jegele me ixomagatijo.

### Nigica anodaagejinaga mewi me jogeegatalo Aneotedogoji

**9** <sup>1</sup> Digawini, nigijo Aneotedogoji meote nigijo odoejege anigote me  
 dinilakidetetege oko, ikeetediogi nigica ane leeditibige me eetibigiwaji  
 nigina modogetetalo nigijo oko, codaa ikeetediogi nigijo oko anodaagee moyoe  
 nigijo aneicoace modogetetalo. <sup>2</sup> Odaa jogodabitegetini nigijo lopegedi anijoa  
 iniwataale letiidi. Ica odoejege le begenegegi niigetecogi we, one liboonagadi,  
 “Nopegedi-le anoiomagaditema Aneotedogoji”. Nigini lopegedi-le ada noledagaxi,  
 acaagaca nameeja, icaagicoa paontedi anoibootalo Aneotedogoji. <sup>3</sup> Codaa onada  
 aca lipegetege ane iomagaditiwage nigidiwa iniwataale letiidi nigijo nopegedi.  
 Icaeledi le anenegegi diigetiwewe catiwedi ane liboonagadi, “Nopegedi-le  
 aneite Aneotedogoji.” <sup>4</sup> Catiwedi niginieledi nopegedi-le, adi aca nameeja  
 oolo aneite moyalegi ica najidi ane liditege lanigi, codaa adi aca iwokodagaxi  
 aneo me nalagatibigogoji maleekoka dinilakidetedogogi Aneotedogoji. Nagadi  
 iwokodagaxi onilegeta oolo. Catinedi nagadi iwokodagaxi ada aca boote  
 anei moyotete ica niweenigi Aneotedogoji ane yajigotediogi loiigi nigijo  
 jotigide, anodita “Maná”. Codaa catinedi adiaagadi nagadi iwokodagaxi idi  
 nigijo ligiilagadi Arão anidioka limedi me dione, icaagicoa itiwataale wetiadi  
 ane liciaceekawa taaboa ane diniditologo liigenatakanegeco Aneotedogoji.  
<sup>5</sup> Ditibigimedi nagadi iwokodagaxi idoa itoataale aanjotedi noenataka  
 oolo, anoditalo “Querubins”. Nigidoa querubins oikee Aneotedogoji miniwa.  
 Oixaketedice labadi oyapogoditini libato nagadi iwokodagaxi. Nigidi ditibigimedi  
 nagadi iwokodagaxi one liboonagadi “Banco aneite Aneotedogoji me iwikode  
 oko.” Natigide agalee jakataga me jelogotaga anodaagee ica nopegedi.

<sup>6</sup> Nigidiaagidi naga igo nigicoa iniwataale letiidi nigijo nopegedi, nigijoa  
 sacerdotitidi dakatiobece inoatawece nokododi catiwedi nigijo odoejege  
 le nigijo nopegedi. Dakatiobece mowote libakedi moyaxawa noiigi  
 modogetetalo Aneotedogoji. <sup>7</sup> Pida ijotawece nigijo ane lacilodi-sacerdotitidi  
 me dakatiobece minitagaeledi nopegedi-le anoyatigi me “Nopegedi-le ane  
 itedibiga Aneotedogoji”, codaa onidateci nicaagabi onidateci me dakatio.

Nigina me dakatio, idioka limedi me yadeegitedio eijeegagi lawodi anoyeloadi. Ibootalo Aneotedogoji nigijoa lawodi eijeegagi eotibige Aneotedogoji me ixomagateetedice epaagaga libeyacegeco, codaa me libeyacegeco nigijo noiigi. <sup>8</sup>Leegodi me ijokijota ica lacilo-sacerdotitedi me dakatio, Aneotedogoji Liwigo ikee nigidi noiigi maleedaga yakadi me dakatiobece aneite Aneotedogoji. Nigijo maleegica ica nopegedi, dinoxoco ica lapoagi miditaga ica aneite Aneotedogoji. <sup>9</sup>Ica nopegedi jotigide, nikeetogowa ica goligi aneote Aneotedogoji natigide mejogota lodoe iniaaginiwa Aneotedogoji. Nigijoa eijedi inaaginao eletidi niboonaga ica noiigi anoyajigotalo Aneotedogoji nigica jotigide agica loniciwaga daga iwilegi laalegenali oko anoyemaa modogetetalo Aneotedogoji. <sup>10</sup>Icoa nakataga jotigide inoka odiigaxinagatece ica anoyakadi mowacipeta codaa moyeligo, codaa anodaagee me niwilecaga. Inaaginao lakataga anetigodiigaxitece anodaagee me idowetagatelo godolaadi. Niginoa nakataga agaleegica niwaló nigijo Aneotedogoji naga dinilakidetacedogogi.

<sup>11</sup>Pida Cristo jigijoa menagi. Jiginiaaginiwa nigicoa sacerdoti gonegegi ane nadeegi inoa anele. Nigica nopegedi analeegite me diba dagaxa mele caticedi nigijo oxiiigodi nopegedi, codaa agica libeyacagajegi. Igaataga agoneleegiwa loenatagi nigica nopegedi, codaa agicatigi nigina iigo. <sup>12</sup>Nigijo naga yakagiditedeloco nigini nopegedi, odao ja dakatedio miditaga aneite Aneotedogoji. Onijoteci me dakatedio, codaa ayadeegitedio lawodi waxigida otegexaagaga waca-lionigi. Pida yadeegitedio epaa lawodi me yajigote Aneotedogoji, nigijoa lawodi ane nadoogodi madataga nicenaganagate. Jigidaa eotedibige Aneotedogoji me yakadi me iwilegi gobeyacegeco codaa meote midioka limedi me godewiga. <sup>13</sup>Nigica jotigide oibake lawodi waxigida codaa me alolanaga, icaagica lajimaga waaca lioneke anoyalegi, odao jogoilaagagaditiogi oko abeyacagaga moiwilegitema loolatedi icoa libeyacegeco, owotibige moyakadi modogetetalo Aneotedogoji. <sup>14</sup>Pida lawodi Cristo dagaxa meliodi loniciwaga. Cristo agica libeyacagajegi codaa agica libatiigi. Codaa Liwigo, ane daga yeleo, yaxawa me dinibooteta Aneotedogoji. Lawodi iwilegitema godaalegena niginoa godoenataka ane beyagi, niginoa anowote me godeleo. Godiwilegi eotedibige me jakataga me jaoga gobakeditema Aneotedogoji, ane ewikegi.

<sup>15</sup>Leegodi Cristo me dinibooteta Aneotedogoji, jiginiaaginiwa ane itedigi liwigotigi, Aneotedogoji inaagoko, odao jegeote gela nimawenegegi me dinilakidetetege Aneotedogoji inaagoko. Joanigidaageote Aneotedogoji nigijo ane enidite me nepilidi, eotedibige moyakadi modibatege inoa anele anakaa ligegi Aneotedogoji me yajigotediogi, niginoa ane daga daateda. Aneotedogoji yakadi me yajigo niginoa anele igaataga nigijo Jesus naga yeleo, odao ja nogatedicoace oko me itelogo libeyacegeco anowote nigijo maleegijo nigijo odoejeji nimawenegegi me dinilakidetetege Aneotedogoji.

<sup>16</sup>Nigina me dinilakidetetedogogi Aneotedogoji liciagi nigijo nakatigi mididi nigina oko ane yeleo. Nigina me yeleo nigina oko ane dinepie. Nigidiaagidi nigicoa ane nepilidi jोगीगिता eledi oko anepaa yemaa me yajigota maleedigicatibige



me yeleo. Odaa odibatege nigicoa ane nepilidi idokidata nige yeleo nigijo oko. <sup>17</sup>Nigida nakatigi agica ane yaxawa nigijo anonibeotege modibatege ane nepilidi nigina oko analeedaga yeleo. Nigida nakatigi idoka diniwaloe nigina naga yeleo nigini ane dinepie, igaataga nigidiaagidi odaa niginaeledi jogoyakadi modibatege nigicoa ane nepilidi nigijo ane yeleo. <sup>18</sup>Joanigidaa leegodi nigijo odoejegi anigotedogowa me dinilakidetedogogi Aneotedogoji, nigijo jotigide idoka diniwaloe nigina monadoogodi lawodi eijedi. <sup>19</sup>Odoejegi Moisés me yelogoditogi noiigi inoatawece liigenatakanegeco Aneotedogoji ane iigete me iditedini. Nigidiaagidi naga dibatalo lawodi wacawaanigi inaa waxigida, odaa ja yawanagaditege ninyogodi, odaa nigidiaagidi ja ibake aca nawodigije ane liboonagadi “hissopo” icaagica waxacoco lamodi anowo me ixagodi. Odaa ja dibatalo ijoa lawodi yawanagaditege ninyogodi, datikata nagada nawodigije, odaa ja iticogoteloco notaganagaxi aniwotologo niigenatakanegeco, codaa iticogoteloco iditawece noiigi. <sup>20</sup>Odaa jegee, “Nigidiwa lawodi joanigidiaa ane ikee Aneotedogoji meote anigotedagawa me dinilakidetedagagitiwaji. Dinilakidetedagagi Aneotedogoji mawii nigina ane iigetedagawa.” <sup>21</sup>Idaagagigota Moisés me iticogoteloco lawodi lopegedi Aneotedogoji codaa inoatawece anoibake modogetetalo Aneotedogoji. <sup>22</sup>Ewi nigijo jotigide Aneotedogoji iige loigi me domogoiwilegitalo icoatawece nigicoa lanodi anoibake modogetetalo. Oibake eijeegagi lawodi nogoiwilegi. Idoka yakaditeda Aneotedogoji me ixomagateedice libeyacegeco oko nigina monadoogodi lawodi eijedi.

**Leegodi Cristo me yeleo, odaa ja yakadi Aneotedogoji me iwilegi gobeyacegeco**

<sup>23</sup>Niginoa lanodi nigini nopegedi anoiwilegitalo lawodi eijedi owote me liwigo nigicoa anidiwa digoida ditibigimedi. Leeditibige moiwilegita lawodi eijedi niginoa enodi digoina iigo. Pida icoa enodi digoida ditibigimedi oyopotibige lawodi ane dagaxa mele me yapitagadi. <sup>24</sup>Igaataga Cristo adakatediwece nopegedi ane loenatagi goneleegiwa. Nigijo nopegedi onowote me liwigo nigica digoida ditibigimedi ane dakatediwece. Idiaa dakatediwece ditibigimedi lodoe Aneotedogoji me dipokotedogoloco natigide. <sup>25</sup>Inoatawece nicaagape ica nisacerdoti-lacilo judeutedi dakatiwece Aneotedogoji ligeladi. Dakatiobece nigica diimigi-le Aneotedogoji ane iomagaditedice mepaagite, odaa yadeegitediobeci lawodi eijedi. Pida Cristo bogonijotece me dakatedio me diniboote Aneotedogoji. <sup>26</sup>Dagaleetigidaagee daganagawini, idioka limedi me dawikode nigijo maleekoka yoeteda Aneotedogoji nigina iigo codaa nigina natigide. Pida anigidaagee. Natigide, ja dinojogotedini icoa owidijedi nokododi, odaa ja dinikee digoina iigo onijoteci me dinikee me dinajigo me yeleo eotedibige me noga libeyacegeco oko. <sup>27</sup>Inatawece oko icota me nigo, odaa onidateci me yeleo nigina oko. Odaa Aneotedogoji ja iwi nigica anigoteta. <sup>28</sup>Jigidaagee Cristo monijoteci me dinajigo moyeloadi. Yeleo eotedibige me noga libeyacegeco eliodi oko. Agaleegenagi daga yeleetacedeloco oko libeyacegeco. Pida dopitedijo meote me newigatace ijotawece nigijo anonibeotege nige dopitacedijo.

**10** <sup>1</sup>Icoa najoinaganegeco judeutedi micataga daga liwa niginoa anele Aneotedogoji ane niwakateetedibigogoji, codaa aliciagi micataga dogoka liwigo. Odaa inoatawece nicaagape onigodi ejedi leegodi libeyacegoco, codaa owote anodaa niigenatakanegeco. Pida lemegegi niginoa ejedi agica loniciwaga degeo me igenagatibigiwaji, codaa ageo me digica libatiigi, nigina oko anoyemaa mototalo Aneotedogoji. <sup>2</sup>Nigina oko anodogetetalo Aneotedogoji daaditigicata libatiigi oditaga ewi, agotagalee odeemitetece me dinilaagetee, codaa tagaga oika monigodi inoa ejedi leegotedi libeyacegoco. <sup>3</sup>Pida anigidaagee. Nigina monigodi ejedi, eotibige idokida ina oko monalagatibige inoa libeyacegoco inoatawece nicaagape. <sup>4</sup>Igaataga lawodi alolanadi, waxigidatedi agica loniciwaga me noga libeyacegoco oko.

<sup>5</sup>Joanigidaa leegodi maleeka doletibige Cristo menagi nigina iigo, odaa meeteta Aneotedogoji,

“Agemaani nigina oko monigodi ejedi leegotedi libeyacegoco otegexaagaga niginoa niboonagatagawa nigina oko. Pida idi yolaadi ane oenitomi me jigeladetiigi.

<sup>6</sup>Ageo maniniitibeci nigina oko moyalegi niginoa ejedi maditaga ganameeja wetiga, otegexaagaga nigina monigodi niginoa ejedi.

<sup>7</sup>Odaa meji,  
‘Ite Ee ina, ja idigo, Inoenogodi,  
janagi me jaote anemaani.

Jigidaagee moiditeloco aneetici maditaga gadotaganagaxi.”

<sup>8</sup>Nigijo Cristo negeetetece nigijoa lotaga baanaga jidiigatedini, mee, “Agemaani nigina oko monigodi ejedi modoletibige monoga libeyacegoco, otegexaagaga niginoa liboonagatagawa nigina oko, otegexaagaga nigina moyalegi niginoa ejedi maditaga ganameeja wetiga. Aganiniitibeci nigina oko mowote nigida loenatagi.” Jigidaa ligegi, idaa gida monigodi ejedi anodaagee icoa niigenatakanegeco me ikeetiigi. <sup>9</sup>Odaa jegee Cristo, “Ite Ee ina, ja idigo, Inoenogodi. Janagi me jaote anemaani.” Jigidaagee Cristo me yaagadi nigijo ligilegegi oxiiigodi monigodi ejedi modoletibige monoga libeyacegoco nigidi oko, odaa jegeote gela lakatigi nigijo naga yajigo epaa lolaadi. <sup>10</sup>Leegodi Jesus Cristo meote ane yemaa Aneotedogoji, odaa yajigo epaa lolaadi moyeloadi, odaa onijoteci me yeleo leegotedi libeyacegoco oko, godawalacetetege ica gobeyacegegi eote moko nepilidi.

<sup>11</sup>Inoatawece nokododi nigina sacerdoti judeu icotio meote ane libakedi, odaa elioditibece monigodi ejedi modoletibige monoga libeyacegoco oko. Pida lemegegi nigijoa ejedi ayakadi me noga libeyacegoco oko. <sup>12</sup>Pida Jesus, ane Gonisacerdoti gonegegi, onijoteci me dinibootedio moyeloadi leegotedi libeyacegoco oko, odaa nigijo loenatagi idioka limedi me diniwaloe. Odaa nigidiaagidi ja nicotedi liwai libaagadi Aneotedogoji. <sup>13</sup>Odaa jigidiaagite Jesus me walite nigepaagicota Aneotedogoji meote me ipoditedeloco nelogododipi. <sup>14</sup>Jigidaagee Jesus onijoteci

me yeleotedeloco libeyacegeco oko, odaa jigidaa leegodi meote midioka limedi me igenaga nigina oko anakaa iomagaditedicoace mepaa nepilidi.

<sup>15-16</sup>Odaa ica Aneotedogoji Liwigo nikeetogowa nigidaagee. Igaataga odoejegi mee,

“‘Jigidaagejigota me idinilakidetge ane jao niginoa nokododi,’  
mee Goniotagodi Aneotedogoji,  
‘Idejate iigenatakanegeco catiwedi laalegenali,  
codaa jaote midioka limedi moyowo iigenatakanegeco.’”

<sup>17</sup>Nigidiaagidi mee,

“Agalee jemaa daga nalagatibigiji nigicoa libeyacegeco,  
otegexaagaga nigijo me degetidadiwagadi.”

<sup>18</sup>Enice nigina Aneotedogoji naga noga libeyacegeco oko, agalee leeditibige dogonigodi eijedi leegotedi libeyacegeco.

### **Jakataga miniga jipecagatege Aneotedogoji**

<sup>19</sup>Enice, inioxoadipi, abo godaalegena me jakagatio aneite Aneotedogoji leegodi Jesus me nadoogoditedogoloco lawodi. <sup>20</sup>Eote gela gonaigi mejogotalo Aneotedogoji. Micataga nigica naigi daga igotece madataga aca lipegetege epoacajo minitaga Aneotedogoji ligeladi. Jesus, anewikegi, jiginiaaginiwa nigijo naigi leegodi me yajigo epaa lolaadi moyaagadi, digo majotaga nagajo lipegetege epoacajo me daa. <sup>21</sup>Odaa ini ica gonisacerdoti gonegegi ane dowediteloco Aneotedogoji loiigi. <sup>22</sup>Enice iniga jipecagatege Aneotedogoji, jinaga jikanaga godaalegena daga godinaale, pida ejiwagataga ajawienaga. Lawodi Jesus noga moko nilaagedi, odaa godapiditema inoatawece gobeyacegeco, micataga nigina ninyogodi ane yapidi me yapitagadi godolaadi. <sup>23</sup>Idioka limedi me inibeonagatege ica gonagajegi Aneotedogoji ane ligegitedogowa, me daga jawienagateda, igaataga Aneotedogoji idioka limedi meote nigina ane ligegi. <sup>24</sup>Eleditace, jowooga nigica anodaagee me jakataga me jaxawanaga me idatawece idinemaanagatiwage, codaa me jaxawanaga inatawece mowote anele. <sup>25</sup>Jinaga jikanaga me jatecogojogo me jilokagatege eletidi anonakato Goniotagodi anee niginaeledi oko, ane daga yatecogotibece. Pida joniciwagatagaeledi oko, enegegi jaogate igaataga me jinataga ja nipegi nigica noko nige dopitedijo Goniotagodi.

<sup>26</sup>Igaataga nigidapaga iniwinagata midioka limedi me jaoga ane beyagi, codaa nige daga jikanaga me jaoga, idagida naga jowoogotaga anewi, agicaeledi gonimawenegegi menitedice gobeyacegeco. <sup>27</sup>Pida idoka jakataga me idoiigata nigica noko Aneotedogoji nige iwi anigotedogowa, codaa me godiloikatidi minitaga noledi ane daga ipe, ane yalegi nigicoa nelogododipi Aneotedogoji.

<sup>28</sup>Nigica jotigide nigina iniwataale ogoa domige iniwatadigini oko nogodi monadieledi oko meo ane daga ikata meo nigijo liigenatakanegeco Aneotedogoji, odaa oyeloadi nigijo oko, agica dogoiwikode. <sup>29</sup>Enice amiida ica anakatitawiji? Igamigote Aneotedogoji ina oko anododigotalo Lionigi Aneotedogoji micataga daga naagogo, codaa igamigigote Aneotedogoji nigina oko ane daga deemitetigi

lawodi Cristo, Aneotedogoji ane dibatetege, meote gela nimawenegegi me dinilakidetedogogi? Nigidiwa lawodi eo nigina oko me yapidi, pida nigina oko ane daga deemitetigi lawodi Cristo idigotalo micataga daga liciaco ejedi lawodi. Codaa nigina oko beyagi me dotagatibige Aneotedogoji Liwigo anidioka limedi meliodi meletedogodomi. Aneotedogoji eliodi me iloikatidi nigina oko liciagi. <sup>30</sup>Igaataga jowoogotaga nigijo nidigo anee, “Emegeeta jiloikatidi nigina oko leegodi niginoa anowote ane beyagi, idinilakidetege.” Codaa eledi ijo nidigo anee, “Goniotagodi iwi anigotediogi loiigi.” <sup>31</sup>Nige iniaaginiwa Aneotedogoji ewikegi iwi anigote oko leegodi libeyacegegi, odaa nigina oko eliodi me doitibigiwaji.

<sup>32</sup>Analakitibigetiwaji anodaageni nigijo jotigide. Nigidiaagidi Aneotedogoji naga ikeetedagawatiwaji nilokokena, eliodi mawikodee, pida agetigadakati. <sup>33</sup>Idatibece nigina ganelogododipi etigadiweenigenitice codaa moyametibigagajitiwaji lodoe noiigi. Idatibece ja gadigomitiwaji me adinawanagatitege nigijoa ane nawikodeega. <sup>34</sup>Nigida makaamitiwaji iwikodeni nigina ane ide niwilogonagaxi leegodi eliwagatakanegegi, codaa ele maniniitibeci nigina modoliceta nigina ane ganebi, igaataga owoogotitiwaji me idi ganagajegi ane dagaxa mele, codaa ane digicata daga daa. <sup>35</sup>Enice idioka limedi mawii mabo gadaalegena manakatoni Aneotedogoji, igaataga yajigotedagawa nigica ganagajegi anele. <sup>36</sup>Adinatiitalo mawii gadawikodico Aneotedogoji ane yemaa, odaa nigidiaagidi akati mabaatege nigijo ane ligegitedagawa me yajigotedagawa. <sup>37</sup>Igaataga diniditeloce lotaganagaxi Aneotedogoji,

“Onanagatecigidiwa nokododi,  
 odaa Nigijoa anicota menagi,  
 jegenagi,  
 codaa ayajebi.

<sup>38</sup>Odaa nigina oko ane igenaga  
 idioka limedi me yewiga  
 leegodi me idadiwagadi.  
 Pida nigina oko anopitege lowidi,  
 ageo me idinitibeci.”

<sup>39</sup>Nigida moko agoko nigina anopitege lowidi, odaa jaganiatagigipi. Pida бага ejiwagataga Goniotagodi, odaa idioka limedi me godewiga.

### Ica oko anoyiwagadi Goniotagodi

**11** <sup>1</sup>Igamodaagee ica mewi mejiwagataga Goniotagodi? Nigina mejiwagataga, ajawienatakanaga me jibagatege nigica gonagajegi ane ligegitedogowa Aneotedogoji. Nigina mejiwagatakanaga, jowoogotaga mewi minoa nigicoa analee daga jakataga me jinataga. <sup>2</sup>Nigica jotigide inatecibece oko anonakato Aneotedogoji, odaa Aneotedogoji ninitedibece leegodi nigijo oko monakato.

<sup>3</sup>Leegodi mejiwagataga, jowoogotaga nigijo jotigide Aneotedogoji mee, odaa iigo, codaa minoatawece aninoa digoida ditibigimedi ja dinikee. Ibake niginoa ane daga jakataga me jinataga meote niginoa ane jakataga me jinataga.

<sup>4</sup>Nigijo jotigide, Abel naga yadeegi eijeegagi me ibootalo Aneotedogoji, nigijo ane yadeegi dagaxa mele caticedi nigijo liboonigi Caim anagaga yadeegitalo Aneotedogoji leegodi Abel me nakato Aneotedogoji. Odaa leegodi Abel me nakato Aneotedogoji, odaa Aneotedogoji ikee me yakadi Abel me igenaga nigijo naga dibatetege nigijo Abel liboonigitalo. Eleeditace, leegodi Abel me nakato Aneotedogoji, odaa micataga dagalee godotaganeege, idaagidata naga jotigide me yeleo.

<sup>5</sup>Leegodi Enoque me nakato Aneotedogoji, odaa ayeleo, pida Aneotedogoji yadeegitedibigimece ditibigimedi, odaa agaleegica monadi. Aneotedogoji lotaganagaxi mee Aneotedogoji me ninitedibece maleedigicatibige daga yadeegitedibigimece ditibigimedi. <sup>6</sup>Nigina oko nige daga nakatoteda Aneotedogoji, nigina oko agica nimawenegegi dogodocagatalo Aneotedogoji. Igaataga nigina oko ane yemaa micotalo Aneotedogoji leeditibige meyiwaagadi miniwa Aneotedogoji, codaa Aneotedogoji me yaxawa nigina oko ane dinonicywaagadi me doletibige.

<sup>7</sup>Leegodi Noé nakato Aneotedogoji, odaa wajipatalo nigijo naga yajoitetece Aneotedogoji niginoa ane doide ane ixomagateetedijo, niginoa anelee daga yakaditeda me nadi. Doitalo Aneotedogoji, odaa jegego nagajo etogo-nelegi, odaa jigidaa leegodi loiigiwepodi nebi naga iwoko nigijo ninyogodi naga yapogoditini iigo. Joanigidaa me ikee minatawece oko nilaagetedipi nigina iigo, odaa Aneotedogoji yakadi me igenaga Noé leegodi eliwagatakaneegegi.

<sup>8</sup>Leegodi Abraão me nakato Aneotedogoji, odaa jegeyiwagadi nigijo naga eniditeta. Odaa jigigo miditaga ica iigo Aneotedogoji ane ligegita me yajigote me nebi. Nigica naga noditice ayowoogodi nigica ane diiticogi. <sup>9</sup>Leegodi me nakato Aneotedogoji, odaa jigidaa ligeladi nigidi nipodigi micataga daga iomigigi miditaga nigidi nipodigi Aneotedogoji ane ligegite me yajigoteta. Digeladetigi nopegedi noiigiwa Isaque ijaa Jacó. Aneotedogoji eledi ligegiteta Isaque ijaa Jacó me yajigotediogi idiaagidi nigidi nipodigi. <sup>10</sup>Abraão ligeladi nopegedi leegodi me nibeotege aca nigotaga Aneotedogoji ane lowoogo meote. Odaa jegeote nagani nigotaga aninoa lipodagalatedi ane digicata ane yakadi me yaagadi.

<sup>11</sup>Leegodi monakato Aneotedogoji, odaa jegeote loniciwaga Abraão ajaa Sara mijo lionigi, idaagida naga laxokodi, codaa Sara mina agica lionigi majo. Aneotedogoji eote loniciwaga Abraão leegodi meyiwaagadi nigijo negeote ligegitetege. <sup>12</sup>Abraão ja dagaxa moxiigodi dagaleegica lionigi, ja liciagi nigina oko émegegi. Pida mijo owidi lawaga, ajakataga me inilaagataga, liciagi yotetitedi digoida ditibigimedi, codaa me liciagi dotiwadi liniogotibece akiidi-eliodi.

<sup>13</sup>Iditawece nigidi oko onakato Aneotedogoji negepaagicota me nigo. Nigidi oko anogodibatege nigica Aneotedogoji ane ligegi me yajigotediogi, pida micataga dogonadita digoida ditigedi, odaa jogoyiwagadi, codaa ninitibigiwaji nigijo nogonadi nigijoa Aneotedogoji ane ligegi meote. Anodaagee mijo me newiga ikee micataga daga iomagaga, codaa micataga daga oko ane digica epaa ligeladi digoina iigo, idioka limedi malatitibigiwaji.

<sup>14</sup>Nigina oko anowote nigida niciagi oikeetiogi inatawece oko modoletibige nigica nipodigi anicota me nebi. <sup>15</sup>Odaa agalee lowoogo dogodopita nigicoa niigotedi anoicogotoci. Dogoyemaa me dopitibeci, domaga yakadi dogoyemaa. <sup>16</sup>Pida odoletibige nipodigi бага даgаxa mele, nigica nipodigi digoida ditibigimedi. Odaa Aneotedogoji aniboligatetece moyatedigi “Inoenogodi”, igaataga ja igodi me yoe nagaca nigotaga ane yajigotediogi.

<sup>17</sup>Abraão nakato Aneotedogoji nigijo Aneotedogoji naga dineeteta. Ibootalo Aneotedogoji Isaque, nigijo anokijoteci me lionigi. Aneotedogoji ligegiteta Abraão me yajigoteta owidi lawaga. Pida Abraão idokee me ibootalo Aneotedogoji Isaque, codaa ja domaga igo me yeloadi me ibootema Aneotedogoji. <sup>18</sup>Aneotedogoji jigijo meete Abraão, “Jao Isaque me eniodi, codaa mowidi lawaga.” <sup>19</sup>Abraão yowoogodi codaa meyiwağadi Aneotedogoji me yakadi meotace me yewiga Isaque, daga yeleo. Nigijo Aneotedogoji me daga ikateda Abraão me yeloadi Isaque, odaa micataga Aneotedogoji degeotace me yewiga, oditaga ja yopilagadite Abraão.

<sup>20</sup>Leegodi Isaque me nakato Aneotedogoji, dipokotalo Aneotedogoji me ibinie Jacó ijaa Esaú, codaa meletetema nigijo itoataale dinioxomigi nigijo malee newiga.

<sup>21</sup>Jacó nakato Aneotedogoji, codaa joanigidaa leegodi, nigijo naga nipegi me yeleo, odaa ja dipokotalo Aneotedogoji me ibinie ijoa itoataale lionaga José. Nigijo naga dipokotalo, Jacó digiilagatedeta ligiilagadi, odaa ja dogetetalo Aneotedogoji.

<sup>22</sup>José nakato Aneotedogoji, nigijo naga nipegi me yeleo, odaa jegeetece nigica noko ica loiigi Israel micota me noditicoaci Egito. Odaa ja yajoitece anodaa leeditibige modigota lolaadi nige yeleo.

<sup>23</sup>Nigica jotigide eliododipi Moisés onakato Aneotedogoji. Joanigidaa leegodi moyagaditini Moisés nigijo negenitini, icoatigilo iniwatadigini epenaitedi. Onadi me libinienigi nigica nigaanigawaanigi, codaa agodoita moyotigimade liigenatakanegegi ninionigi-eliodi Egito me nigodi nigaanigipawaanigi.

<sup>24</sup>Leegodi me nakato Aneotedogoji, Moisés naga goneleegiwa odaa agalee yemaa modita me lionigi aca liona Faraó, ninionigi-eliodi Egito. <sup>25</sup>Pida idapaga niwita me lawikodagawepodi loiigi Aneotedogoji, idigida ayemaa daga dioteci lakataga noiiğitigi Egito, oditaga eo ane beyagi. Leegodi me yowoogodi monateciğidiwa nokododi me godewiga nigina iigo. <sup>26</sup>Moisés dagaxa me yakadi mele me dawikode codaa monietibige leegodi me dibatema Aneotedogoji, digo mijoataga Cristo me dawikode. Codaa ayakadi mele me nepilidi icoatawece nigicoa ane niliicagajetecidi Egito. Codaa micataga daga iwita nigica nagajegi Aneotedogoji ane yemaa me yajigoteta.

<sup>27</sup>Moisés noditicogi nipodigi Egito leegodi me nakato Aneotedogoji, idigida aleegodi daga doita inionigi-eliodi ane yelatema. Dinatitalo inoatawece micataga daga nadi nigicoa Aneotedogoji, ane digica oko ane yakadi me nadi. <sup>28</sup>Leegodi eliwigatakanegegitema Aneotedogoji, odaa ja yojogoti odoejegi nalokegi anodita me Páscoa, odaa ja iige loiigi moyatitalo lapoaco lawodi waxacoco, eotibige ica aanjo gonematagodi me daga nigoditeda odoejedi lionaga nigidi loiigi Israel.

<sup>29</sup>Leegodi monakato Aneotedogoji, loiigi Israel odigotinigi liwigotinigi akiidi-eliodi anodita me “Lixagotegegi”. Ica ninyogodi ja digoxaticoace, oada jogodigotinigi iigo ane yadilo. Pida nigijoa niodagawadi Egito nigijo naga domaga digetita, oada ninyogodi ja yapogoditiniwace, oada jogocegaga.

<sup>30</sup>Leegodi eliwagatakanegegi nigijo noiigi Israel, nigijo naga onawiile nibaloote nelegi nigotaga Jericó nigijoatigilo seete nokododi, oada nigijo baloote jegenitini. <sup>31</sup>Aca Raabe, one ewocoma, pida ikee me nakato Aneotedogoji nigijo mele me dibatege catiwedi ligeladi nigijoa israelitadedi anigotibeci moigoadita nigotaga me digica ane yowoogodi. Leegodi Raabe me nakato Aneotedogoji, oada ayeleo agawatege nigijo eledi nigeladimigipi ane dogoyiwagaditeda Aneotedogoji.

<sup>32</sup>Jakadi daga jowidagatee yotaga, pida agaleegabo inimedi daga idalagata Gideão, Baraque, Sansão, Jefté, Davi, ija Samuel, ijaagijo anoyelogoditedibece Aneotedogoji lowooko. <sup>33</sup>Leegodi monakato Aneotedogoji, oidelege eletidi noiika, pida idokee moigeke. Nigijo naga niigenatakanaga owote nigica ane igenaga, oada Aneotedogoji ja yajigotediogi nigijo ane ligegitediogi meote. Leegodi monakato, Aneotedogoji noxoco liaontedi niolatedi nigina midatibece ane doide. <sup>34</sup>Ideite liwigotigi noledi, pida anabidaga, iwoko me nigodi nodaajo-ocagataga. Idiaagidi ijo me agamalagaga, pida nigidiaagidi jegeote me loniciwengenaga. Nigina me nidelaga ida loniciwaga, oada jogoigeke inoa iodagawadi iomagaga. <sup>35</sup>Leegodi monakato Aneotedogoji, ijo iwaalepodi anodibatacege lionaga me newigatace, idaagida naga domaga nigo. Nigijo eledi oko anidiaagidi nigidi noiigi nawikodeega me iteloco libaagadi laxakawepodi negepaagicota me nigo. Agyemaa me beyagi modotagatibige Aneotedogoji oditaga dinikaticoace me diniwilotibigiwaji leegodi moyiwagadi Aneotedogoji meote me newigatace midioka limedi me ide Miniwataga, codaa meote ane dagaxa mele lewiga.



(Hebreus 11.28)

<sup>36</sup>Ijo eledi onietiniwace codaa monalaketiniwace, inaageledi oigoetiniwace, odaa oyokoletiwace niwilogonagaxi. <sup>37</sup>Iditecibece onigidatiniwace, idiaageledi oyociwigi natecogotedi, iditecibece odineetiogi oyatitioyi nawikodico, idiaageledi onigodi oyatitioyi nodaajo-ocagataga. Idiaanagadiite, odinixotinigi lamodi waxacoco, codaa me waxigida. Madewetedipi, codaa oiatetibeci, oyametibigo. <sup>38</sup>Idiaanagadiite wetice inoa nigotadi minoataga nipodaga ane yadilo ane digicata nigeladimigipi, minoataga wetiadi, codaa modigeladetigilo niginoa lawimajetedi-wetiadi, codaa me niginoa becoli catinedi iigo. Agele nigijo oko digidioka limedi me newiga liwigotigi nigina oko anida aneetege nigina iigo, igaataga dagaxa meletibigiwaji, aliciagi nigina oko anida aneetege nigina iigo. <sup>39</sup>Iditawece nigidi oko owo Aneotedogoji meliodi me ninitedibece leegodi monakato. Pida anogodibatege nigica Aneotedogoji ane ligegi me yajigotediogi. <sup>40</sup>Leeditibige monibeotege nigica nagajegi, igaataga Aneotedogoji lowoogo me najigotedogowa nigica gonagajegi ane dagaxa mele, odaa jagaga yajigotediogi idiaagidi nigidi lagajegi yawanagaditedogogi me yajigotediogi.

### Aneotedogoji Godiodi

**12** <sup>1</sup>Enice micataga daga idi eliodi oko anetigodiwi, nigijo baanogoikee monakato Aneotedogoji, godiciagi nigina nalokodegecajo. Odaa leegodi meliodi anetigodiwi, jikanagaticoace inoatawece niginoa anetigodibeyacagadi, codaa minoatawece gobeyacegeco anetigodigoetini, odaa jaoga godoniciwaga me jalokodagaticogi odoe, codaa me idinatiigatalo inoatawece ame godawikodico. <sup>2</sup>Iniga jalokodaga, idioka limedi me jiwinaagatalo Jesus aneote me jakataga me godewigatace, odaa icota me godicogetacedini icaagica nige naga godeleo, leegodi me jinakatonaga. Igaataga Jesus akaa yowoogodi nigidiaagidi meliodi me ninitedibece. Joanigidaa leegodi me dinatiteta nigijoa lawikodico, codaa me dinatiteta niboliga nigijo naga yeleotedeloco nicenaganagate. Natigide ja nicote liwai libaagadi aca nibaanco gonege aneite Aneotedogoji me nicotedi.

<sup>3</sup>Amina begele mowoo. Ijaagijoa Goniotagodi, eliodi me dawikode codaa dinatite ijoatawece ane beyagi anowotema nigijoa abeyacagaga. Joanigidaagee nigowootibige Goniotagodi, odaa aganigaaxetiwaji migetaga adinibadaani. <sup>4</sup>Nigina makapetegetiwaji ane beyagi, anigica daganadoogoti gadawodi, digo mijoataga Jesus me nadoogodi lawodi. <sup>5</sup>Pida gadaagititece nigijoa lotaga Aneotedogoji anowo gadoniciwaga, nigijo negeetedagawatiwaji makaami lionigipi. Mee,

“Ionigi,

atacolitece nigina Goniotagodi Aneotedogoji me gadiloikatiti.  
Jinaga adinajicitini nigina me diojotedagadici.

<sup>6</sup>Igaataga Goniotagodi Aneotedogoji diojotetece nigina lemaanigipi,  
codaa me iloikatidi inatawece nigina ane dibatetege me lionigipi.”

<sup>7</sup>Adinatiitalo gadawikodico micataga nionigi nigina eliodi me iloikatidi.  
Igaataga nigina mawikodee Aneotedogoji idigotedagawatiwaji micataga



makaami lionigipi. Agica ini nionigi ane dogodiojotece eliododipi. <sup>8</sup>Aneotedogoji diojotetece inatawece lionigipi. Akaami nige daga diojotedagadici, odaa amewi makaami lionigi, pida dicakaami elinigi. <sup>9</sup>Nigina godiododipi metigodalake leegodi nigina ane beyagi ane jaoga, odaa nigida moko jeemitegatibige godiododipi. Pida dagaxatace me leeditibige mejiwagataga Godiodi ane ideite ditibigimedi ane iige niginoa niwicidi, odaa jigidaagele mejinaga me godewiga. <sup>10</sup>Oatecigidiwa nicaagape nigina godiododipi modiojotogodici nigica anoyemaa modigotogowa anoyakadi meletogodomi. Pida Aneotedogoji бага diojotedogodici nigina meletogodomi eotedibige me idejinaga digo mijoataga me digicata libatiigi. <sup>11</sup>Nigina me diojotedogodici, ica ina daga beyagitogodomi, ageo me godinitibece. Pida nigidiaagidi, nigijo Aneotedogoji ane diojotetece icota moyakadi lewiga ane igenaga, codaa meote laalegena mele.

### Notaga anetigodiladee

<sup>12-13</sup>Enice awii mabo gadaalegena, codaa jinagadinopootiwaji leegotedi niginoa gadawikodico, micataga nigina oko me dinigaaxe, ane dinigaaxe libaagatedi, codaa me nagamalaga lokotidi. Odaa jigidaagee maxawani nigina oko ane degeliodi eliwagatakanegegi. Nigidi oko liciagi nigina oko alejaado. Pida nigodiotagadicitiwaji me iwitece naigi ane igenaga, Odaa agalee wayoditibigiwaji, pida jegele mewaligitibigiwaji.

<sup>14</sup>Oleetibige me gadewiki me dagakapetege migetaga adinotigimadenitege eledi oko, codaa adinoniciwagatitiwaji me atamitege inoatawece ane beyagi, odaa gadewikitema iniokiniwateda Aneotedogoji. Nigina oko ane daga dinatamagateetege ane beyagi ayakadi me nadi Goniotagodi Aneotedogoji. <sup>15</sup>Adinowetitiwaji me digica oko ane dagadiaa yemaa Aneotedogoji meote aneletema. Codaa adinoweti adigicoa ane liciagi nagana nawodigije ane bayodi, ane ili, oditaga jegeo eliodi oko me neelotikanaga leegodi niweneeno. Oditaga nigidi oko jogowo eliodi oko mowo libeyacegegi. <sup>16</sup>Codaa adinowetitiwaji adigicoa ane loomatewa ane daga lodawateda, oditaga agalee deemitetibige Aneotedogoji ane yemaa, mijotaga Esaú aneo nigijo jotigide. Esaú iikoetege onidateci ginogo niweenigi nigijoa ane domaga dibatege, leegodi modoejegi nionigi me domaga dibatege, nigicoa ane nepilidi eliodi, digicota me yeleo eliodi. <sup>17</sup>Owoogotitiwaji me domaga yemaa digidiaagidi daga dibatege mijotaga eliodi nigicoa ane nepilidi mijo modoejegi me nionigi. Pida ayakadi igaataga agica nimawenegegi daga iigi nigica baanaga igo, idaagee me domaga doletibige ica nimawenegegi, codaa anoetibece.

<sup>18</sup>Nigijo nigicootalo Aneotedogoji, nigida makaamitiwaji aganagi anipecita ganigetigidi anakati mabaatelo, mijotaga loiigi Israel menagitibeci. Otota negepaa maditaga wetiga anodita Sinai. Onica noledi ane noditicogi nagajo wetiga, nexogoteloco codaa eliodi me nexocaga, codaa me diwocotaka. <sup>19</sup>Odaa jonogowajipata ica layaagegegi aca goloneeta icaagica nigege. Nigica nogowajipatalo Aneotedogoji me dotaga, odaa jogodipokota me notokotedini.

<sup>20</sup>Odipokotalo me notokotedini leegodi agaleegoyakadi dogodinatita nigica liigenatakanegegi Nigijoa ane dotaga, negee, “Codaa me eijeegagi, nige iigotege nagani wetiga, leeditibige monigidatice nigepaa yeleo.” <sup>21</sup>Nigijoo anonadi eliodi me doitibigiwaji, codaa mee Moisés, “Jawigice me idoi.”

<sup>22</sup>Pida micataga digicootatiwaji degepaa maditaga wetiga anodita Sião, codaa nigepaa manitaga nigotaga Aneotedogoji, Nigijoa ewikegi. Codaa micataga digicootatiwaji negepaa nagaca nigotaga digoida ditibigimedi, ane liboonagadi Jerusalém, onidiwa icoa anige liwokodi miili aanjotedi, yatecogo me naloogo.

<sup>23</sup>Odaa akaamitiwaji jigicoota aneite Aneotedogoji lionigipi liidadi me yatecogo me naloogo. Nigidi lionigipi idiwa liboonagatedi diniditedini digoida ditibigimedi. Akaamitiwaji aatalo Aneotedogoji ane iwi anigoteta inatawece oko, codaa managi negepaa aneite nigijoa liwicidi nigijoo oko ane igenagatibigiwaji, Aneotedogoji aneote me digicata libatiigi. <sup>24</sup>Odaa jaganagitiwaji miniwataga Jesus, Nigijoa aneote gela anigotedagawa me dinilakidetedagagi Aneotedogoji, codaa me ilaagagaditedice lawodi. Nigijoo naga nadoogodi lawodi, odaa ja nogatedice moko nilaagedi, odaa jegeote nigica ane dagaxa mele, pida baadaga liciagiteda Caim me nadoogodi lawodi Abel, odaa ja nilaagedi.

<sup>25</sup>Enice adinowetitiwaji me dogowocetege majipaata Nigijoo ane gadotaganegeni digoida ditibigimedi. Nigijoo jotigide, nigijoo anodowocetege mowajipata latematigo Aneotedogoji ane yelogodi digoina iigo, agoiwokotibigiwaji, pida Aneotedogoji iloikatidi. Nige dogoiwoko nigijoo oko, oko eledi agica gonimawenegegi daga godiwoko nige daga jibagatege Aneotedogoji lotaga ane icogotedibigimece ditibigimedi. <sup>26</sup>Nigijoo jotigide ica layaagegegi eo me datalale iigo. Pida natigide eote ligegi, mee, “Jaotace odanigidatece natalalaga, pida aginokina iigo me datalale, codaa me ditibigimedi datalale.” <sup>27</sup>Nigina mee, “Jaotace odanigidatece”, nikeetedogowa me itinege codaa me ilatike nigina ane liidagatajegi codaa me jakataga me jinataga, eotedibige nigina ane daga ditinege me yakadi midioka limedi me iteloco anei.

<sup>28</sup>Enice, ja jinataga me jibagatege nigica inioxigi ane digicata ane yakadi me igike, iniotagodeegatalo Aneotedogoji, codaa me jogeegatalo nigica anodaa yemaateda, codaa me jeemiteegatibige, codaa idoiigatalo nigina me jogeegatalo. <sup>29</sup>Igaataga Gonoenogodi liciagi nigina noledi ane yalegi inoatawece.

### Anodaagee me jocaganagatalo Aneotedogoji

**13** <sup>1</sup>Oleetibigetiwaji midioka limedi madinemaanitiwage, igataga akaami dinioxomigipi. <sup>2</sup>Inigica daaditaga amedegeni nigina anoyiwagadi Goniotagodi ane digica me gadowoogotagipi nigina mototagawa, igataga jigijoo oko anoimedege aanjotedi, pida agica dogoyowoogodi me aanjotedi. <sup>3</sup>Idioka limedi manalakitibigetiwaji maxawani nigina anoyiwagadi Goniotagodi ane niwilogojedi, micataga dagakaami eledi ganiwilagawepodi. Eleditace oleetibige midioka limedi manalakitibige nigina ane nawikodeega leegodi eliwigatakanegegi micataga dagakaami eleditetiwaji gadawikodagawepodi.

<sup>4</sup>Idatawece leeditibige me jeemiteegatibige nigina oko ane wadonadipi. Niginoa goneleegiwadi, iwaalepodi wadonadi, leeditibige me loomatewa inokina ane lodawa. Igaataga Aneotedogoji iwi anigoteta codaa me iloikatidi nigina oko ane loomatewa ane daga lodawa.

<sup>5</sup>Jinegewianaga emaani dinyeelo, pida aniniitibecitiwaji leegodi nigica anidi makaamitaga, igaataga mee Aneotedogoji, “Agica daga gadikanitice, otegeaagaga gadalatitiwaji.” <sup>6</sup>Odaa jakataga me daga jawienatakanaga, codaa mabo godaalegena, mejinaga,

“Iniotagodi Aneotedogoji Jiginiaa ane idaxawa,  
codaa agica ane idoita,

igaataga nigina oko agica loniciwagatiloco degeo ane beyagitomi.”

<sup>7</sup>Analakitibigetiwaji nigijoa odoejedi gadacilodi anoyelogoditedagawa Aneotedogoji lotaga. Digowoowiwaji nigica anodaagee midioka limedi monakato Goniotagodi negepaagicota me nigo. Akaamitiwaji anakatoni Goniotagodi, digo mijotaga monakato. <sup>8</sup>Igaataga Jesus Cristo adiniigi. Eginiaaginiwateda jotigide, ina noko, codaa midioka limedi nigijjo anee, nigepaa ganigicatibige. <sup>9</sup>Enice jinaga domigikani inoa eletidi niigaxinaganegeco iomagaga degetigadaeegiticogi wetice nigijjo naigi anewi, niigaxinaganegeco anodakapetege godiigaxinaganegeco. Ele nigina godiwigo me yeligo nigicoa anele Aneotedogoji anidioka limedi me godediatetece, idigida ayeligo nigicoa niigenatakanegeco anoditece niweenaga. Igaataga niginoa niigenatakanegeco anoditece niweenaga agoyaxawa oko anodoletibige moyotete niigenatakanegeco anowo me ili eliwagatakanegegi.

<sup>10</sup>Icoa nisacerdotitidi judeutedi anodibatigi Aneotedogoji ligeladi oyeligo nigijoa eijedi anonigodi, odaa jogoyajigotalo Aneotedogoji. Pida baadogoyakadi moyeligo Nigijjoa ane yeleotedogodomi maditaga nameeja Aneotedogoji, nigijjo ane jelicaga. <sup>11</sup>Nigica lacilo-sacerdotitidi judeutedi yadeegi eijedi lawodi catiwedi nigica le Aneotedogoji ligeladi anoiomagaditema iniokiniwateda Aneotedogoji, igo me yajigotalo Aneotedogoji lawodi leegotedi nibeyacegeco. Pida nigijjoa eijedi anonigodi бага oyadeegitedicogi we nigotaga, odaagoyalegiteda. <sup>12</sup>Joanigidaa leegodi Jesus magaga yeleo wetice ica lapoagi-nelegi nigotaga, eotedibige me yakadi me ibake epaa lawodi me napitagadi libeyacegeco noiigi. <sup>13</sup>Enice iniga miniwataga Jesus, micataga daga wetice nigotaga, codaa idinatiigata niboliga digo mijoataga me dawikodetetema niboliga, nigijjo loiigi nogonietidibige odaa jogoyeloadi micataga daga gonematagodi. <sup>14</sup>Igaataga nigina iigo agaca gonigotaga anidioka limedi mani, pida inibeonagatege gonigotaga anicota me gonebi ganigida noko.

<sup>15</sup>Enice idioka limedi me jajicagatalo Aneotedogoji goboornigitalo, goboornigi me jogeegatalo. Jesus yajigote goboornigi Aneotedogoji. Nigina me jibakenaga gonioladi me iniotagodeegatalo, me jogeegata Liboonagadi. <sup>16</sup>Jinigikani mawii anele codaa mawalaceni nigicoa ane ganepilidi adinaxawanitiwage, igaataga nigina me jaoga nigida anejinaga, micataga daga jaoga nogeedi Aneotedogoji nigina aneliodi me yemaa.

<sup>17</sup>Iwagati niginoa gadacilodi codaa mawii nigica ane liigenatakanegegi. Igaataga idioka limedi modoweditologo gadiwicidi, codaa moilakidetedini naalewe miniwataga Aneotedogoji, nigica ane libakedi. Nige iwagati, odaa ninitibigiwaji nigina me nibaaga. Pida nige daga iwagati odaa agecagalodipi codaa libakedi agadaxawanitiwaji.

<sup>18</sup>Oleetibige midioka limedi motaganegeni Aneotedogoji mipokitogoloco midioka limedi me jaoga ane igenaga. Ajawienatakanaga me daga jeemiteegatece moko nilaagedi catiwedi godaalegenali. Odaa inoatawece ane jaogate jemaanaga me jaoga nigina ane igenaga. <sup>19</sup>Pida jipokotagawatiwaji mepaanaga otaganegeni Aneotedogoji amaleegaga idimonyatace makaamitaga me digica ane jopagadi.

### **Jotaganegenaga Aneotedogoji**

<sup>20</sup>Aneotedogoji Jiginiaaginiwa aneote godaalegena mele. Eote Goniotagodi Jesus me yewigatace leegodi me nadoogodi lawodi, odaa jigidaagee negeote gela anigote me dinilakidetetege Aneotedogoji inaa oko. Jesus liciagi nigina nelegi nowienogodi waxacocoli (leegodi me doweditedeloco loiigi).

<sup>21</sup>Joanigidaa leegodi me jemaanaga Aneotedogoji me yajigotedagawatiwaji inoatawece anele anopootibige mawii nigica ane yemaa. Codaa jemaanaga me ibake loniciwaga Jesus Cristo meote catiwedi gadaalegenali inoatawece anodocagatibigo. Odaa jigidaagee midioka limedi me jogeegatalo Cristo. Amém.

### **Owidijedi notaga**

<sup>22</sup>Inioxoadipi, jipokotagawatiwaji nigina majipaatalo niginoa yotaga, anejitece me gadoniciwagati. Mabaatege codaa madinatiitalo yotaga, igaataga nagadi iwakate ane jiditibigagaji agocagataga. <sup>23</sup>Jemaa mowoogotitiwaji gonioxa Timóteo naga noditice me diniwilo. Nige age menotiwa, odaa jadeegi, ixigagawa nigejigo makaamitagatiwaji.

<sup>24</sup>Idecoaditibige iditawece ane lacilodi Aneotedogoji loiigi, codaa miditawece Goniotagodi loiigi digoida makaamitagatiwaji. Gonioxoadipitigi Itália eledi oyecoaditibigagaji.

<sup>25</sup>Jemaanaga Aneotedogoji midioka limedi meletedagadomitiwaji. Odaa jigidaagee. (Amém.)